



Mir findes glatt – d Schoof seggle in der Stadt

Der Vessels sait, das wär doch ächt grien,
Wenn d Stadt voller Schööfli wär, wo graase dien,
Die Schoof seggle in unserer grieni Velostadt,
Und dien derby beggele, das wär doch sau glatt.

Drumm mien jetze zerscht alli Auti verschwinde,
Au wenn das die Lädelibesitzer nit so guet finde,
Die sotte iire Plunder halt nit deert verkaufe,
Wo Schoof seggle, ummesteen oder duure laufe.

Uff dääre iir Lamentiere ka ich scho lang nimme loose,
D Hauptsach isch, d Schoff seggle in unsere Schtroosse.
Au sinn so Lääde in der Innerstadt soowisoo kai hit,
Wells bi dääne nidemool e Veloschtänder git.

Die Schoof seggle aber, und das kamme loobe.
Sie frässe das Gras ab und schisse derby uff e Boode,
Dermit dien si dä Raase beschstens dünge und pfläage,
Drumm ka ich mit mym E-Bike rassig druff umme fääge.

Und alli mini Schoof seggle mir denn hinde dry,
Bis zue mym Byyroo sin sii immer derby,
Deert diemer denne unseri Kepf zämmeschtegge,
Zem neyi, hailoos dummi Voorschrifte uss zhegge.

Hets denne Schoof in alle Innerstadt Stroosse,
Kenne uns au d Rammelbuure in Kappe bloose,
Die bruuche uns denne kai Fleisch mee bringe,
Drumm hänn sii jetze Zyt, iir Rotschtalied z singe.

Der Stadtgärtner Üzkül saits unumwunde,
Well die Schoffe seggle, au do am Ryybord unde,
Muess ich ab jetze my Räche in e Egge stelle,
Und uff der Schtell aafoo, mit Schööfli zelle.

Der beesi Wolf schlyycht drumm hinde duure,
Dää hätti gärn soone Schoff in der Schnuure,
Drumm sotte die griene Ideologe aafoo blaane,
Es gheert äntlig e zimpftige Schoofhirt aane.

Der Lips kasch nit nää, fir dää ischs z spoot,
Dä wais drumm nit, was in Basel so alles abgoot,
Dä ka halt nuur syyni Bolizische quääle,
Und zwischeduure no, der Baschi strääle.

Do lyttet der Gaisepeeter aa,
Är sait, s Heidi wetti gärn dä Boschte haa,
Si wissi aber nit, ob me sii dooderfiir nimmt,
Well nämmlig, iir Barteibiechli nit stimmt.

Fir soone Staatsschtell muesch jo nit gaignet sii,
Hauptsach de hesch e Abschluss in Psychologie,
Oder susch immene Brootloose Schtudium,
Denn e bewääarte Praktiker, wär dooderfiir z dumm.

Wenn die Schoff seggle, in der Stadt,
Isch das amänd doch nit esoo glatt,
Well die schtändig duurenander wiete,
Und usser der Dummheit, alles wänn verbiete.